

Regional News Unit AIR Aizawl

Monday, June 17, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Kumin January leh May thla inkara Mizoram Police leh Excise and Narcotics department hnathawkte heroin man belh khawm chu kg 67 leh gram 2 a tling.
- Myanmar leh Bangladesh atanga raltlan bakah Manipur atanga sahimna zawng mi 44,749 Mizoramah an awm mek.
- Manipur Governor chuan President hnenah Manipur buaina avanga in leh lo rauhsante tanpuina a dil.
- India chuan Russia leh Ukraine buaina chu inbiakna hmanga muanawm taka chinfel a pawimawh thu a sawi.

<><><>

DRUG SEIZURE

Kumin January leh May thla inkara Mizoram Police leh Excise and Narcotics department hnathawkte heroin man belh khawm chu kg 67 leh gram 2 a tling.

Police hian kumin thla 5 chhung hian heroin kg 38 leh gram 651 an man a, hemi chhung vek hian Excise and Narcotics department-in kg 28 leh gram 369 an man bawk a; January leh May thla inkar chhung vek hian Police leh Excise and Narcotics department-te hian a vaiin Methamphetamine kg 201 leh gram 973 an man bawk.

Police bik hian thla 5 kal ta chhung khan Methamphetamine mum ni lo, Crystal Meth kg 13 leh gram 49 an man a. Crystal Meth hi a man a to em avangin kg 13 chuang hret hi Cheng Vbch 40 leh Nuai 47 hu ni-a chhût a ni.

Nikum kha Mizorama ruihhlo man tam ber kum a ni a, Police leh Excise and Narcotics-te heroin man belhkhawm chu kg. 144 leh gram 113 a ni a. Methamphetamine hi nikum khan Police leh Excise hian kg. 253 leh gram 678 an man bawk a. Nikuma Police-in Crystal Meth an man hi kg 49 leh gram 5 a ni a, a hun lai khan Cheng vaibelchhe 147 leh Nuai 1 hu anga chhut a ni.

Excise and Narcotics department bik hian kumin January leh May thla inkar chhung khan ruihhlo chi hrang hrang kaihhnawihah mi 3,130 an man a. Nikum chhung khan Narcotic Drugs and Psychotropic Substances, 1985 dan hmangin thubuai 725 an ziaak lut a, mi 1,088 an man a. Nikuma ruihhlo leh zu vanga an man zinga 83 chu ramdangmi an ni.

<><><>

REFUGEES

Myanmar leh Bangladesh atanga raltlan bakah Manipur atanga sahimna zawng mi 44,749 Mizoramah an awm mek.

Home department atanga thu dawn dan chuan Myanmar atanga raltlan hi mi 33,926 an awm mek a. Kum 2021 February ni 1-a sipaiin an ram rorelna an hnehchhuh atanga tlanchhiaa Mizorama awm zui ta an ni hlawm a, tun hnai thleng khan lo chhuk an la awm reng a. District zawng zawng 11-ah inzar pharhin mipa 10,177 leh hmeichhia 10,905 leh naupang 12,844 an ni a. Myanmar raltlan 9,987-te hi relief camp 111-ah awmin mi 9,905 chu an chhungkhat lainate emaw thiante bulah emaw anmahni inluahah emaw an khawsa a ni.

Bangladesh Chittagong Hill Tracts atanga rawn tlanchhiate hi Lawngtlai district-ah vek an awm tih home department hotute chuan an sawi a, tunah hian mi 1,872 an awm mek a, an zinga 580 hi mipa an ni a hmeichhia 499 leh naupang 793 te an ni. An zinga engemawzat hi Lawngtlai district-a relief camp 12-ah awmin a dangte chu khaw 11-a an chhungte leh thiante belin an awm a ni. Bangladesh atanga raltlan rawn lutte hi Bawm hnam an ni ber a, anmahni chuan Kuki-Chin an inti a. Kuki-Chin National Army (KNA)-in Chittagong Hill Tracts-a an chenna hmuna thuneihna sang zawk an ngiat avangin Bangladesh sipaite nen an inkap deuh reng a, chumi vanga rawn raltlan an ni.

Nikum May ni 3 atanga Manipur-a chi leh chi inkara tharum thawhna avanga chenna tur nei lo leh sahimna zawnga Mizorama rawn lut a awm mek hi mi 8,951 an ni ve thung a. An zinga mi 1,294 te hi relief camp 23 ah awmin mi 7,657 te chuan Mizoram district 9-ah an chhungkhat laina leh thiante an bel a. Hnahthial leh Lunglei district-ah Manipur atanga ral tlan an awm ve lo a ni.



NEW CRIMINAL LAWS

Tun thla ni 1 atanga hman tan tura sawrkar laipuiin dan thar a siam 3-ah hmeichhia leh naupang humhimna tam zawk awmin pawikhawihthu hremna atan vantlang tana hna thawhtir an ni dawn.

Mizoram Law College-a Assistant Professor Pi Zoparliani Khiangte sawi danin he dan tharin a tum ber chu dan hman lai mek chu tunlai thiamna leh hmasawn zel nen a inmil tawk tawh lo niin an ngai a. Thlak danglamna lianah chuan pawikhawihna thenkhat hremna tihsana harsatna thenkhat thuneihnain a huam chin tih chian leh dan bung leh chang hman tlak tawh loh paih te a ni, a ti. IPC tih thin chu Bharatiya Nyaya Sanhita (BNS) 2023 a rawn ni dawn, a ti a; Cr. PC chu Bharatiya Nagarik Suraksha Sanhita (BNSS) ni tawhin Indian Evidence Act ni thin chu Bharatiya Sakshya Adhinyam (BSA) a ni tawh dawn a ti bawk. Asst. Professor sawi danin he dan tharah hian hmeichhia leh naupang chung a pawikhawihna hremna a rawn awm belh a, Penal Code-a mi hrem theih nana hmasa ber atan vantlang hnathawh a rawn dah thar a. A hmaa IPC ni thin nena danglamna lian zualah dan bawhchhiatna jail tan theihna chi 33 a awm belh a, heng bakah hian dan bawhchhiatna sum leh pawisa chawitir theihna chu 83-in a tam ta zawk a ni, a ti bawk.

Pi Zoparliani chuan Dan tharah hian vantlang tana hnathawh chu hmun tam takah hremna atan an rawn dah thar, a ti a. Hetiang hmang hian zu ruih avanga buaina siam te leh vantlang tana hnawksaka awm te hrem thin an ni dawn a. He dan thar hnuaiah hian a huhua mi khawih, Mob Lynching chu a tlem berah kum 7 tal tan theihna turin a rawn dah tih sawiin Mizo chu inthuruala thil tih mai ching an nih avangin buainaa bul tumtu nih kher loh pawhin inhnahmawih vangin a tan theih tih a sawi a. Indian Evidence Act ni thin Bharatiya Sakshya Adhinyam (BSA) 2023 hnuaiah Court-in social media leh tunlai thiamna hmanga evidence an neihte thu tlingah a pawm tawh dawn a ni, a ti a. Hetah hian tun lai thiamna electronic media hrang hrang leh social media te pawh huam thei tur Digital Media an rawn duang thar a, smartphone hman te pawh an phal tawh a ti bawk.



LADC POLLS

Tun thla Ni 27-a Lai Autonomous District Council (LADC) hnuaia VC inthlan leh Lawngtlai Chandmari bial MDC by-election neih turah Candidate-te'n beihpui an thlak tan.

LADC hnuaia Village Council 99 a Member 595 thlanchhuah turah Member 99 chu Hmeichhe tana seat hauh niin a bak 496 chu mitin chuh theih bial a ni a, VC chuh tumte'n vote zawn an ngawrh chho tan viau tawh a. VC tam zawk chu kilthum atangin INC, MNF leh ZPM ten an chuh a rinawm. Lawngtlai Chandmari bialtu MDC Dr Lorrain Lalpeklana Chinzah chu Assembly inthlanpui ah Lawngtlai East bialah ZPM Ticket in thlantlin nih taka Chandmari bial a chhuahsan tak vangin by election a awm dawn a. MNF chuan an candidate atan Pu C. Lalsawmzuala an ruat a, Congress chuan a hrana Candidate siam lovin MNF Candidate hi an pui dawn a. ZPM chuan an Candidate atan Pu F. Hrangtukhuma an puang thung a ni.

Chandmari bial chuh tuma hming pe lut an la awm lova hming pekluh theih hun hi naktip Thawhlejni thleng hawn a ni.

VC inthlana Vote tlate hi Inthlanni June 27 vote thlak zawhah chhiar nghal a ni dawn a, Ballot paper hman a ni ang. Lawngtlai Chandmari bial MDC by-election ah hian EVM hman a ni dawn a, vote tlate chu July 1-ah chhiar a ni dawn a ni.



ASF

Niminah African Swine Fever (ASF) vei vawk 22 a thih belh leh avangin Mizoram puma he vawk pulhri leng avanga kumina vawk thi zat chu 2,179 a tling ta.

Animal Husbandry and Veterinary department hotute'n an sawi danin ASF vawk pulhri darh zel tur venna atan nimin khan vawk 115 tihhlum a ni bawk a. Kumina vawk pulhri darh tur venna atana vawk tihhlum tawh zawng zawng hi 4,642 a tling tawh a ni. Nimina vawk thite chu Saitual district a Thanglailung khua a 19 leh Serchhip district-a Chhiahtlang khua a vawk 2 leh Baktawng khua a 1 thite a ni. Nimina vawk suatte chu Serchhip district-a Chhingchhip khua a 98 bakah Khumtung leh Baktawng a 3 ve ve tihhlumte a ni a. Aizawl district-ah Darlawng khuaah 7 leh Tlungvel ah 4 tihhlum a ni bawk.



MANIPUR GOVERNOR ANUSUIYA UIKEY CALLS ON PRESIDENT DROUPADI MURMU

Manipur Governor Anusuiya Uikey-i chuan President Droupadi Murmu-i chu New Delhi-a Rashtrapati Bhawan-ah nimin Pathianni khan a hmu a.

Manipur Governor hian tun hnaia Manipur-a tuilianin thil a tihchhiat dan te, State leh Sawrkar laipui atanga chhanchhuah leh chhawmdawl hna thawh dante President hnenah hian a hrilh a ni.

Anusuiya Uikey-i hian Manipur buaina avanga chenna in leh lo rauhsante chu sum leh paia tanpui turin President hi a ngen a. Manipur Governor hian Union Finance Minister Nirmala Sitharaman-i pawh a hmu bawk a ni.

<><><>

ASSAM CM HIMANTA BISWA SARMA INAUGURATES JANATA BHAWAN SOLAR PROJECT

Assam Chief Minister Himanta Biswa Sarma chuan ni zung chakna hmanga kawlpheha siam chhuah Janata Bhawan Solar Project Guwahati-ah a hawng.

He ni tha hmang kawlpheha hi in chung leh lei lama bun kawlpheha megawatt 2.5 pechhuak thei a ni a. He kawlpheha hi chawhruala thla khatah unit nuaih 3 thar chhuak thei, cheng Vbch 12 leh Tld 56 senga siam a ni a. Thla khata a hlep theih tur cheng nuai 30-a chhutin kum 4 chhunga a senso phuhruk thei tura ngaih a ni.

He Ni tha hmang kawlpheha hawn a nih takah hian Assam Secretariat Complex chu chawmtir a ni a. India rama Ni tha hmang kawlpheha hlanga chawm Secretariat hmasa ber a ni ta a ni.

He kawlpheha hian kum 25 chhungin boruak chhe siamchhuah chu kum khat atan metric ton 3060 zelin a titem dawn a ni.

<><><>

INDIA EMPHASIZES LASTING AND PEACEFUL RESOLUTION TO RUSSIA-UKRAINE CONFLICT THROUGH DIALOGUE AND DIPLOMACY

India chuan Russia leh Ukraine buaina chu tha tete-a inbiakna hmanga muanawm taka chinfel a pawimawh thu a sawi.

Ukraine muanna kawng dapa thutkhawm ni 2 awh Summit on Peace in Ukraine chu Switzerland-a Burgenstock-ah nimin khan tihtawp a ni a. Hetah hian Ministry of External Affairs-a Secretary (West) Pavan Kapoor-a chuan India ai a awh a. India palai hi he thutkhawmah hian a hawn atanga a tawp thlengin a tel kim a ni.

<><><>